

IZJAVA
predsjednika Bošnjačkog nacionalnog vijeća dr. Sulejmana Ugljanina, nakon
objavljenih prvih rezultata izbora za BNV,
Novi Pazar, 22:30h, 04. novembra 2018. godine.

Želim da vam kažem nekoliko riječi o ovim proteklim izborima, o izbornim rezultatima. Najprije mogu da kažem da sam vrlo sretan, zadovoljan i ponosan što su ovi izbori protekli u jednoj pozitivnoj političkoj atmosferi zbog činjenice da su Bošnjaci na ovim izborima potvrdili da su jedan zreo narod.

Danas su Bošnjaci u Sandžaku i širom ove zemlje gdje su bila biračka mjesta, izabrali Bošnjačko nacionalno vijeće. Ovo je novi saziv Bošnjačkog nacionalnog vijeća, u kojem najviše predstavnika ima lista Samoopredjeljenje.

Mi ćemo raditi kao jedan tim, Bošnjačko nacionalno vijeće ne pripada ni jednoj političkoj grupaciji niti jednoj političkoj opciji, to je bošnjačko, najviše zvanično opšte javno dobro koje se bori da zaštiti i unaprijedi i globalne bošnjačke nacionalne interese i identitet i sva Ustavom i zakonima zagarantovana prava. U tom smislu, moram da kažem da su ovo najznačajniji izbori za Bošnjake od raspada bivše SFRJ.

Zašto – zato što Bošnjaci u ovoj državi Srbiji imaju mnogo neriješenih pitanja i veliki broj problema. Bošnjaci su izabrali svoje Bošnjačko nacionalno vijeće koje ima sva zakonska ovlaštenja da u razgovoru sa državnim organima i predstavnicima međunarodne zajednice rješava sve nagomilane probleme i sva neriješena pitanja.

Zašto su u ovom trenutku ovo najvažniji izbori? - Zbog toga što Bošnjaci od raspada bivše SFRJ još uvijek nisu u Srbiji dobili ranije stečeno pravo naroda. Bošnjaci su u bivšoj SFRJ bili narod, jedan od 6 državotvornih i konstitutivnih naroda, i raspadom te države do danas u državi Srbiji Bošnjacima nije vraćeno ranije stečeno pravo.

Druga stvar, Sandžak je okupirana zemlja, to svi znamo, od 1912. godine pa na ovamo, i status Sandžaka još nije riješen. Ni Srbija ni Crna Gora nemaju tapije nad Sandžakom, i ako hoće da uknjiže Sandžak u svoju imovinu u svoje zemljišne knjige, moraju da uknjiže i Bošnjake kao narod u svoj Ustav, to je uslov.

Lista „Samoopredjeljenje“ je, prema tome, dobila podršku i dobila najviši broj glasova na ovim izborima i mi ćemo legitimno to da zastupamo. Mi ćemo zajedno sa listom „Vakat je“ već imamo 22 zajednička vijećnika, formirati većinu, a i svim ostalim učesnicima izbornog procesa ostaje da uđu u sastav Bošnjačke narodne skupštine, i da zajedno rješavamo probleme. Ono što sam govorio cijeli izborni proces Bošnjaci će dobiti, tad sam govorio, a sad kažem Bošnjaci su dobili Bošnjačku narodnu skupštinu.

Obavijestićemo i srpskog predsjednika, srpsku skupštinu, srpsku Vladu i sve srpske institucije prvenstveno, a u drugom, da kažem, zvaničnom krugu, obavijestićemo i one što se zovu i zvanične institucije Republike Srbije, to su dvije stvari, da se zna.

Jedna stvar su institucije Republike Srbije koje se biraju regularno na izborima i koje zastupaju jednu parlamentarnu demokratiju, Ustavnu demokratiju. A drugo su srpske institucije koje zloupotrebjavaju pojedinci da kroz ove republičke institucije provode

apartheid i formiraju jednu šovinističku grupaciju koja je vrlo štetna i opasna za Bošnjake.

Prema tome, mi ćemo obavijestiti, kada dobijemo i zvanične rezultate, konstituisati ćemo Vijeće, obavijestit ćemo javnost i krenut ćemo da u skladu sa izbornim rezultatima, sa izbornim programom radimo u čitavom narednom mandatu. Još jednom da kažem da se zahvaljujem svim učesnicima izbornog procesa, posebno svim Bošnjacima što su izbori protekli u miru. A ja moram da poručim ljudima iz Beograda, posebno onima koji su imali želju da nam uzmu Vijeće u ruke, da im je to propalo. Znači, Bošnjačko nacionalno vijeće je ostalo bošnjačko i biće bošnjačko, biće jedan dobar partner državnim organima Republike Srbije, Crne Gore, Bosne i Hercegovine i Evropske Unije, biće dobar partner da razgovaramo o svim pitanjima koji će biti od opšteg interesa i za Bošnjake tj. za bošnjački narod, za srpski narod, crnogorski, albanski narod, za ljude u Bosni i tako dalje.

Nisam nezadovoljan nego sam sretan. U prošlom mandatu smo imali apsolutnu većinu, ali smo imali državu koja je davala pojedincima vlast u ruke, stavila ih iznad vlasti da obesmisle parlamentarne izbore u Srbiji, dali su svome ljubimcu pravo da ruši najstariju medresu u Novom Pazaru u Miloševićevo vrijeme, sada su u Novom Pazaru prije mjesec dana srušili najstariju džamiju, odnosno kulturno historijski spomenik koji pripada svim građanima Pazara i Sandžaka. Bez dozvole, bez projekta, bez ičega, da je sruše i bace u smeće. I pokušali su da sruše demokratski izabranu skupštinu grada Novog Pazara, silom, nasiljem, uz pomoć i asistenciju policije. Nisam nezadovoljan baš sam zadovoljan da zajedno sa više političkih opcija dijelimo odgovornost i da zajedno pobjedimo tu neman koja se zove jedna fašistička tvorevina jedna srpska država Srbija. Koja želi da legalizuje zločine genocida i sve druge zločine kao političko sredstvo za osvajanje teritorija i rješavanje političkih pitanja.

Međunarodna zajednica jeste osudila ovu našu državu Srbiju da je kriva za zločin genocida nad Bošnjacima u Sandžaku, Bosni i Kosovu, Haški tribunal je osudio i okrivio za zločine u Kukurovićima ali još nisu izreknute kazne i dalje stoji to, stoji presuda ali bez izrečene kazne. U tim uslovima ratni zločinci se osjećaju u Srbiji kao u sigurnoj kući. To je naša bruka i naše zlo. Međutim, mi ćemo, ako Bog da, sa normalnim demokratski orijentisanim ljudima u Srbiji, da se riješimo toga zla da uvedemo jednu pravnu državu u kojoj će svako zlo biti kažnjivo, u kojoj neće moći niko da ruši a ostane nekažnjen, neće moći ni da zida, ustvari važit će zakon za sve ljude jednako.
